

Служба праведному Петру Калнышевскому

Тропарь, глас 5:

Церкви верный сын явился еси,/ Петре–козаче праведный,/ во страданиях терпелив быв,/ от земли отцев твоих отлучен,/ Небеснаго Отечества достигл еси,/ и гонения терпеливодушно претерпев,/ дерзновение имаши молитися к Подвиго- положнику Христу// спастися душам нашим.

Кондак, глас 8:

Взбранному в ратех и преудобренну в праведницех,/ православною мудростию сияющему великому воеводе,/ благодарственная восписуем ти, блаженне:/ ты же, яко имеяй дерзновение у Престола Христова,/ сохраняй молитвами твоими люди твоя,/ верою тя чтущия и воспевающия ти:// Радуйся, Петре, Отечества нашего похвало и утверждение.

На велицей вечерни

Блажен муж: 1-й антифон. На Господи, воззвах: стихиры, глас 4.

Приидите, вернии,/ днесь стецемся на похвалу праведника богомудраго,/ Петра, добраго воина Христова,/ светом жития своего люди в вере утверждающаго,/ Православия поборника,// выну благодарение Богу за вся приносити нас научающаго.

Власти, славы и самаго себе отрекся,/ и крест страданий взял еси на рамена своя,/ с радостию Христу последовал еси,/ и по Нем возшел еси в нетленную славу Царства Его,/ Емуже днесь предстоя, угодниче Христов Петре,// моли спастися душам нашим.

Твое сердце от юности разжже любовь Христова,/ и настави к пути, ведущему во град Небесный,/ имже шествуя, ведущим тя кротости и смирению,/ достигл еси по желанию твоему Небесных обителей,/ идеже днесь со Ангелы ликуя, преблаженне Петре,// моли спастися душам нашим.

От благочестиваго корене израсл еси,/ розго благоплодная, Петре всечестне,/ измлада бо крест, яко оружие, на рамо твое приял еси,/ веру, яко щит, надежду, яко шлем,/ истиною же чресла твои препоясал еси./ Сего ради ликуя ныне со Ангелы,// непрестанно моли о душах наших.

Слава, глас 8:

Приидите, верных собори,/ псалмы и песньми духовными/ честь воздадим Начальнику спасения нашего,/ во святых Своих дивному,/ и тако возопиим:/ Господи, молитвами Твоего угодника Петра блаженнаго,/ спаси и ущедри всех,// благочестно поющих Тя.

И ныне, Догматик, глас тойже: Царь Небесный:

Вход. Прокимен дне, и чтения 3.

Притчей чтение (главы 10, 3 и 8):

Память праведнаго с похвалами, и благословение Господне на главе его. Блажен человек, иже обрете премудрость, и смертен, иже уведе разум. Лучше бо сию куповати, нежели злата и сребра сокровища. Честнейшая же есть камней многоценных, все же честное недостойно ея есть. Долгота бо дней и лета живота в деснице ея; в шуйце же ея богатство и слава. От уст ея исходит правда, закон же и милость на языке носит. Послушайте убо мене, о чада, честная бо реку: и блажен человек, иже пути моя сохранит: исходи бо мои, исходи живота, и уготовляется хотение от Господа. Сего ради молю вас, и предлагаю мой глас сыновом человеческим: яко аз, премудрость, устрой совет и разум и смысл аз призвах: мой совет и утверждение, мой разум, моя же крепость. Аз мене любящия люблю, ищущии же мене обрящут благодать. Разумейте убо, незлобивии, коварство, ненаказаннии же, прилагайте сердца. Послушайте мене и паки, честная бо реку, и отверзу от устен правая; яко истине поучится гортань мой, мерзки же предо мною устны лживыя. С правдою вси глаголы уст моих; ничтоже в них стропотно, ниже развращенно. Вся права суть разумевающим и проста обретающим разум. Научаю бо вас истине, да будет о Господе надежда ваша, и исполнитесь Духа.

Притчей чтение (главы 10 и 11):

Уста праведнаго каплют премудрость: язык же неправеднаго погибнет. Устне мужей праведных каплют благодати, уста же нечестивых развращаются. Мерила льстивая мерзость пред Господем: вес же праведный приятен Ему. Идеже аще внидет досаждение, тамо и безчестие: уста же смиренных поучаются премудрости. Совершение правых наставит их, и поползновение отрицающихся упасет их. Не пользуют имения в день ярости, правда же избавит от смерти. Умер праведный, остави раскаяние: наручна же бывает и посмеятельна нечестивых пагуба. Правда непорочнаго исправляет пути, в нечестие же падает неправда. Правда мужей правых избавит их: безсоветием же пленяются беззаконнии. Скончавшуся мужу праведну, не погибнет надежда: похвала же нечестивых погибнет. Праведник от лова убежит, вместо же его предается нечестивый. Во устех нечестивых сеть гражданином, чувство же праведных благопоспешное. Во благих праведных

исправится град, усты же нечестивых раскопается. Ругается гражданином лишенный разума, муж же мудрый безмолвие водит.

Премудрости Соломоновы чтение (глава 4):

Праведник, аще постигнет скончатися, в покои будет. Старость бо честна не многолетна, ниже в числе лет исчисляется. Седина же есть мудрость человеком, и возраст старости, житие нескверное. Благоугоден Богу быв, возлюблен бысть, и живой посреде грешник, преставлен бысть. Восхищен бысть, да не злоба изменит разума его, или лесь прельстит душу его. Рачение злобы помрачает добрая, и парение похоти пременяет ум незлобив. Скончався в мале, исполни лета долга. Угодна бо бе Господеви душа его. Сего ради потщася от среды лукавствия. Людие же видевшие, и не разумевше, ниже положше в помышлении таковое: яко благодать и милость в преподобных Его, и посещение во избранных Его.

На литии стихиры храма и святаго, глас 1:

В Запорожской земли, якоже солнце,/ возсиял еси чистотою твоею,/ бремя правления народного право несый, и во брани оружием защищая люди твоя,/ сугубыя чести сподобился еси, Петре Богомудре,/ всех привлекаая сердца и помышления/ к твоим подвигом, преславне.

Слава, и ныне, Богородичен, глас тойже:

Радуйся, Святая Богородице Дево,/ чистый сосуде всея вселенныя,/ свеще неугасимая, вместилище Невместимаго,/ храме неборимый;/ радуйся, из Неяже родися Агнец Божий,/ вземляй грехи всего мира.

Стихиры на стиховне, глас 2:

Пения сладкая,/ страданий твоих похваления,/ благодеяний славословие,/ благородства почествование,// приими, Петре блаженне.

Стих: Праведник, яко финикс, процветет,/ яко кедр, иже в Ливане, умножится.

Восхвалим днесь песненно/ Церкве Русския похвалу,/ доблемудраго Петра,/ храняща Отечество свое// ненаветно молитвами своими.

Стих: Блажен муж, бояйся Господа,/ в заповедех Его восхощет зело.

Правым подобает похвала/ царственный пророк Давид рече/ тем тебе, праведниче боголюбезный/ Петре досточудный,// днесь песньми ублажаем.

Слава, глас тойже:

Троицы вернаго служителя,/ Церкве светильника всесветлаго,/ Петра предивнаго/ ныне, в память его сошедшеся,// воспоем любовию.

И ныне, глас тойже:

Пресвятая Мати Божия,/ с лики преподобных/ молися из Тебе
Воплощенному,/ Солнцу Правды, Господу,// спасти и просветити души наша.

Тропарь святого, глас 5:

Церкви верный сын явился еси,/ Петре праведный,/ во страданиях
терпелив быв,/ от земли отцев твоих отлучен,/ Небеснаго Отечества
достигл еси,/ и гонения терпеливодушно претерпев,/ дерзновение имаши
молитися к Подвигоположнику Христу// спастися душам нашим.

На утрени

По 1-м стихословии седален, глас 1:

На земли живя, земная мудрствовати презирал еси, но, внимая словесем
спасительным, весь ум твой вперял еси в Горняя, сего ради и сам ныне в
Горних водворяешися, Петре чудне.

Слава, и ныне, глас тойже:

Невесто Неискусобрачная,/ премудрости село показася утроба Твоя Бога
Слова:/ Ты бо едина, Мати Божия,/ благих Ходатаица явившися,/ всяких
страстей избави рабы Твоя,/ непрестанно воспевающия славу Твою.

По 2-м стихословии седален, глас 8:

Память твоя, славне страдальче Петре, украшает днесь Церковь Христову,
призывающи нас песньми по достоянию восхвалити тя, Богомудре, яко
воистинну воина Христова, темже мольбами твоими избави нас от бед и
лютых обстояний.

Слава, и ныне, глас тойже:

Чертог, присносущною славою украшен, видяще выну,/ желание имамы
совнити в онь,/ но, одежды не имуще, стыдимся,/ да не связаны от Ангел и
извержени будем./ Ты, сущи одежда нагих дерзновения, Дево Марие,
украси ны/ и введи внутрь Небеснаго Чертога.

По полиелеи седален, глас 8:

Благочестно на земли в законе Господни пожив,/ веру непорочну соблюл
еси в сердца твоем,/ в злочлочении скончав добрый подвиг,/ семена
добродетелей сеяв,/ пожал еси плоды трудов твоих/ и венец сугуб от руки
Вседержителя приял еси, блаженне Петре,/ и Того славы сподобился еси./
Темже, предстоя Святей Троице,/ молися за Отечество твое и люди,//
чтуция любовию святую память твою.

Слава, и ныне, глас тойже:

Богородице Дево,/ Вседержавная наша Царице,/ омофором молитв Твоих покрывающая весь мир,/ прими от благодарных сердец наших/ похвальные песни сия/ и испроси нам у Сына Твоего Богоначального// грехов прощение и велию милость.

Степенна, 1-й антифон, глас 4.

Прокимен, глас 4: Возвеселится праведник о Господе/ и уповает на Него.

Стих: Услыши, Боже, глас мой, вегда молитимися к Тебе. **Всякое дыхание:**

Евангелие от Матфея, зачало 16.

По 50-м псалме стихира самогласна, глас 6:

Зависти ради и злобы человеческия/ заключение во обители Соловецкой/ от единовверных приял еси,/ Богомудре Петре праведне,/ подвигами славнаго жития твоего/ сонму мучеников и преподобных сочитался еси,// с ними же молися спасися душам нашим.

Канон святому, глас 2.

Песнь 1.

Ирмос: *Грядите, людие, поим песнь Христу Богу, раздельшему море, и наставльшему люди, яже изведе из работы египетския, яко прославися.*

Подвиги и добродетели твоя славныя воспети сподоби, Петре чудне, дивному во святых Своих Богу славословие приносяще.

Измлада Христа возлюбил еси и Пречистую Его Матерь, всеблаженне Петре: храмы многия устроил еси, сего ради возвеличи тя Господь в житии твоём.

О Царстве Небеснем выну помышляя, Единого всех Царя Бога возлюбил еси, с Нимже ныне водворяся в Небесных обителях, моли Его о чтущих тя, Петре досточудне.

Богородичен: Обрадованная Гаврииловым возвещением, Приснодево Чистая, рождшая на радость всех Бога, спаси молитвами Твоими Богородицу Тя почитающих.

Песнь 3.

Ирмос: *На камени мя веры утвердив, расширил еси уста моя на враги моя. Возвесели бо ся дух мой, вегда пети: несть свят, якоже Бог наш, и несть праведен паче Тебе, Господи.*

Христоролюбиваго нрава никогдаже отлучаяся, всем убогим был еси благих милостивый податель, праведне Петре, и сирым заступник.

Дозревшим твоих добродетелей гроздием, неправедное заключение претерпел еси и увязлся еси венцем безкровнаго мученичества, и преподобных житию сочитался еси.

Украсил еси подвиги своими обитель Соловецкую, преблаженне Петре, земных пристрастий отвергся, Небесный мир в сердце твое приял еси.

Богородичен: Ненасеянная земле, глаголом Божиим прорастившая Божие Слово, Того моли, Всепетая Богородице, избавитися нам от всяких зол и напастей.

Седален, глас 4:

Страстотерпцев подражателю,/ не убоялся еси пострадати,/ яко добр воин Иисус Христов,/ изволением быв мученик./ Темже и с мученики венчался еси, Петре предивне,// от Подвигоположника Иисуса.

Слава, и ныне, Богородичен:

Покров Твой, Дево Богородице, простри над смиренными воспеватели Твоими и сохрани нас от бед и скорбей, матернюю любовь к нам недостойным являюще.

Песнь 4.

Ирмос: *Пришел еси от Девы, не ходатай, ни Ангел, но Сам, Господи, воплощся, и спасл еси всего мя человека. Тем зову Ти: слава силе Твоей, Господи.*

Ни молва мирская, ни слава ратная, ни богатство временное, ниже затворение неправедное твоего к Богу устремления не угасиша, Петре достохвальне, возлюбил бо еси крепко богоугодныя подвиги.

Учения отеческая храня невредимо, от юности имел еси житие чистое и милосерд был еси, Петре досточудне.

Слушай молитвы праведных Твоих, Господи, услыши молитву и праведника Твоего Петра, юже приносит Тебе о роде своем.

Богородичен: Пречистая Дево Богоотроковице, матерним Твоим взором призри на нас, страстьми плененных, и от рова греховнаго изведи нас.

Песнь 5.

Ирмос: *Света подателю и веков Творче, Господи, во свете Твоих повелений настави нас; разве бо Тебе иного бога не знаем.*

Святая Богородицы чудотворный образ Новокайдакский украсил еси, досточудне Петре, всю свою надежду на Первообразную полагая в житии своем, ведый Тоя всесильное заступление.

Церквей основатель и украситель был еси, преблаженне, храм светозарен Господеви имея сердце твое; храмы и нас соделай Духу Святому богоприятными твоими молитвами, Петре всечестне.

Якоже злато огнем, праведне, страданьми себе очистив, красно показал еси Творцу жилище, сего ради тебе порфиру нетленну вечнаго блаженства дарова Господь.

Богородичен: Вседержителя Господа явилася еси вселение, Мати Преблагословенная, идеже Бог человеку сочется.

Песнь 6.

Ирмос: *В бездне греховней валяся, неизследную милосердия Твоего призываю бездну: от тли, Боже, мя возведи.*

Изгнание, клевету и злобу людскую претерпел еси, Петре добропобедне, всегда упование возлагающе на Господа Спасителя твоего.

Род, и богатство, и державу отъяша от тебе завистцы, ты же взем крест свой, подвизался еси богоугодно, тем ныне с преподобных лики радуешься.

Ревновав в добродетелех Богомудрым отцем, Евангельское семя Божия слова в сердце твоем насадил еси, и плод принесл еси Владыце, тем и мзду от Него приял еси достойную.

Богородичен: Исцели изъязвленную страстьми душу мою, Пречистая, матерню Твоею молитвою Божественное врачевание прилагающе.

Кондак, глас 8:

Взбранному в ратех и преудобренному в праведницех,/ православною мудростию сияющему великому воеводе,/ благодарственная восписуем ти, блаженне:/ ты же, яко имеяй дерзновение у Престола Христова,/ сохраняй молитвами твоими люди твоя,/ верою тя чтущия и воспевающия ти://
Радуйся, Петре, Отечества нашего похвало и утверждение.

Икос:

Всечестную память почтим угодника Христова, Петра благовернаго, благочестием от юности украшена, и радостных глаголы от сердца воззовем к нему, сице вопиюще: Радуйся, от юности Бога возлюбивый; радуйся, благочестия столпе, вражими прилоги непоколебимый; радуйся, заповедей Господних исполнителю усердный; радуйся, преданий отеческих хранителю неослабный; радуйся, воинству православному споборниче; радуйся, православных людей защитниче. Радуйся, Петре, Отечества нашего похвало и утверждение.

Песнь 7.

Ирмос: *Да преславное рождество Твое, Христе,/ еже от Девы прообразиши яве,/ неопалимы в пеци отроки сохранил еси,/ песньми поющыя Тебе:/ отцев, Боже, благословен еси.*

Щитом ограждаем благочестия, был еси, блаженне, образ всем людям, прежде народного правления бремя несый, послежде в обители Соловецкой неисходно пребываяй, на всяко время Господеви поя: отцев Боже, благословен еси

Силою Божиею укреплен, плотския удержал еси стремления и ум направил еси к Небесным, поя в крепости: отцев, Боже, благословен еси.

Приидите, людие, песньми похвальными прославим нашего заступника, достохвального и Богомудраго атамана Петра, благочестно поюще: отцев наших Боже, благословен еси.

Богородичен: Любоблагоутробная Мати, не престай о нас молящися, Дево, яко верным Ты еси утверждение и крепость Божественная.

Песнь 8.

Ирмос: *Пещь иногда огненная в Вавилоне действия разделяше,/ Божиим велением халдеи опаляющая,/ верная же орошающая, поющая:/ благословите, вся дела Господня, Господа.*

Великое твое заступление и добродетели воспоминаем, Богоблаженне Петре, и сего ради собравшися в день памяти твоея, яко общему за всех нас предстателю, хвалу воздаем ти, воспевающе: благословите, вся дела Господня, Господа.

Трудолюбием плоть свою изнурил еси, всечестне, и безстрастием боголюбивую душу твою возрастил еси, в нюже благодать Пресвятыя Троицы всельшися, всего тя светоносна содела, непрестанно вопиющая: благословите, вся дела Господня, Господа.

На Небесех ликуют чини ангельстии, блаженне Петре, и верных собори на земли, память твою похваляюще, вопиют: благословите, вся дела Господня, Господа.

Христу Богу молися, великий наш заступниче, о приходящих к тебе с верою и тепле вопиющих: благословите, вся дела Господня, Господа.

Богородичен: Агница Непорочная, Рождество Свое на Кресте распинаема зрела еси, грех мира сокрушающее. Темже Тя, Мати, чтим во вся веки.

Песнь 9.

Ирмос: *Безначальна Родителя Сын, Бог и Господь, воплощся от Девы нам явися, омраченная просветити, собрати расточенная: тем всепетую Богородицу величаем.*

Несумненная надежда был еси сыновом запорожским к защищению отечества, но Премудрый о всех Промыслитель благоволи ты прияти безмятежна в покой Свой, идеже увязлся еси нетленными венцы.

Мудрость Небесную стяжав и разум имый Богом просвещен, смирением сердца украшен и высотой жития сияяй, к Небесным прешел еси обителем, идеже нас помяни, почитающих тя, Петре досточудне.

Память празднственную и благ всех ходатайственную совершаем честнаго Твоего от земли преставления: ты бо угодник Господень и заповедей Того делатель явился еси непостыден, Петре всечестне.

Богородичен: Юзилиц адских Опустошителя рождшую, Чистую Деву, Матерь Бога Слова, в песнях хвалебных присно величаем.

Светилен, глас 2:

Богом возженный светильниче Церкви пресветлый, Петре достохвальне, освящение испроси душам нашим, твоими теплыми ко Господу молитвами.

Слава, и ныне, Богородичен:

Славословие Тебе приносим, Мати Дево, явившей миру Свет Присносияющий, тьму неверия и греха расточающий, и присною радостью души наша исполняющий.

На хвалитех стихиры святого, глас 1:

Твоих подвигов достойно приял еси честь/ и, венценосец, ныне на Небесех со Ангелы веселишися,/ идеже пророков собор, и апостолов,/ и мучеников истинно воинства многая,/ идеже патриархов лики;// поминай нас, Петре чудне.

О верно творящих твою память/ и многия подвиги и страдания твоя поющих,/ не престай моля, блаженне Петре,/ присно сохранити от бед и скорбей/ и будущия сподобитися жизни,/ праведниче славне и приснопамятне.

Стяжал еси первее честь земную,/ славою народоправления украсився,/ послежде подвиги постническая и безвинная страдания восприял еси,/ достоблаженне Петре,/ Темже и ныне не отрини нас от твоего заступления,// любовь восхваляющих тя.

Память твоя во век пребывает, славне Петре:/ аще бо и преставился еси от нас,/ но не отступаеши от нас духом любви твоея,/ Божию Престолу предстоя и со Ангелы ликуя на Небесех,// с нимиже моли помиловати Отечество наше// и даровати нам велию милость.

Слава, глас 8:

Веселия исполняется днесь земля Запорожская,/ и обитель Соловецкая красуется/ в торжестве предивнаго и Богомудраго Петра,/ и с ними вси народи Отечества нашего ликовствуют,/ прославляюще единаго от воевод великих,/ исповедника твердаго, добродетельми сияющаго,/ и с любовью вопиют ему:/ спасай нас молитвами твоими,// Петре, присный наш предстателю.

И ныне, глас тойже:

Владычице, прими молитвы раб Твоих/ и избави нас// от всякия нужды и печали.

Славословие великое и отпуст. И бывает помазание братии от лампы святаго.

НА ЛИТУРГИИ

Блаженны от канона песнь 3-я и 6-я. Прокимен, глас 4: Возвеселится праведник о Господе/ и уповает на Него. Стих: Услыши, Боже, глас мой, внегда молитимся к Тебе. Апостол ко Ефесеим, зач. 233. Аллилуиа, глас 4: Праведник, яко финикс, процветет,/ яко кедр, иже в Ливане, умножится. Стих: Насажденнии в дому Господни во дворех Бога нашего процветут. Евангелие от Матфея, зачало 11. Причастен: В память вечную будет праведник:

МОЛИТВА

О, Петре всеславне, праведниче достоблаженный! Услыши моление нас, грешных, добродетельное твое житие похваляющих, ратныя подвиги чтущих и страдания почитающих! Теплым твоим предстательством умоли Господа, да простит наши согрешения вольная и невольная и очистит нас от всякия скверны плоти и духа! Молим тя, Петре терпеливodusный, испроси нам у Христа в вере и благочестии крепкое стояние, в скорбех благодушие, в напастех терпение, в искушениях крепость, да соблюдет от суемудрых и душетленных учений, да сохранит сердца наша от соблазнов мира сего и да научит чистоте и целомудрию. Ей, угодниче Божий, исходатайствуй молитвами твоими у Христа Бога по молитвам Его Пречистой Матери Отечеству нашему мир и благоустроение, всем же нам в правоверии, чистоте и целомудрии всегдашнее пребывание, избавление от козней диавольских и злобы человеческия, от суемудрых и душетленных учений; яко да и мы купно с тобою и всеми нашими святыми сродниками прославим Единосущную Троицу, Отца и Сына и Святаго Духа, во веки веков. Аминь.